

29 AUG 1997

Mahathir-Deklarasi

MAHATHIR TERIMA DEKLARASI SEMERAK

PASIR PUTEH, 29 Ogos (Bernama) -- Barisan Nasional (BN) Kelantan hari ini menyerahkan kepada Perdana Menteri Datuk Seri Dr Mahathir Mohamad "Deklarasi Semerak" yang menggariskan iltizamnya untuk menawan semula Kelantan daripada Pas.

Dengan menggunakan singkatan "SEMERAK" yang membawa maksud "Sedia Merampas Kelantan", deklarasi tujuh perkara yang diluluskan pada Konvensyen Umno/BN Kelantan mengisytiharkan azam dan tekad BN negeri untuk terus menyemarakkan iltizam bagi mengembalikan Kelantan ke pangkuan Umno.

Deklarasi itu dibaca dan diserahkan Pengerusi BN Negeri, Datuk Annuar Musa, yang juga Timbalan Pengerusi Badan Perhubungan UMNO Negeri, pada perhimpunan bersama rakyat sempena penutup konvensyen dua hari itu, bermula semalam, di Sekolah Menengah Cherang Ruku, Semerak, di sini. Dr Mahathir adalah Pengerusi BN dan Pengerusi Badan Perhubungan Umno Kelantan.

Kira-kira 10,000 orang hadir pada perhimpunan itu.

Berikut adalah intipati deklarasi itu :

- \* Bersungguh-sungguh meletakkan perpaduan sebagai agenda utama perubahan bagi mengelakkan perpecahan seperti pertandingan jawatan dalam parti, politik, kepentingan peribadi, hasad dengki, penyalahgunaan kuasa, rasuah dan politik wang;

- \* Memantapkan jentera parti di semua peringkat dan menghidupkan kembali jentera pilihan raya di semua kawasan bagi membolehkan ia digerakkan secara sistematik dan bersepadu apabila diperlukan;

- \* Memulakan gerakan besar-besaran ke arah memberi kesedaran dan penerangan kepada rakyat mengenai keluhuran perjuangan Umno;

- \* Menggembleng tenaga anak-anak Kelantan yang berada di dalam dan luar negeri ini ke arah melahirkan agenda bertindak yang boleh menjadikan Kelantan negeri contoh yang gemilang dalam pelbagai bidang;

- \* Berusaha memupuk budaya politik yang baru berteraskan sifat dan nilai-nilai mulia bagi membina kekuatan dan kemampuan meneruskan perjuangan;

- \* Terus berusaha dengan perasaan terbuka dengan semua pihak bagi mewujudkan kerjasama untuk memajukan rakyat Kelantan; dan

\* Mengorbankan masa, tenaga dan fikiran bagi memastikan hasrat suci deklarasi terlaksana demi perjuangan Umno dan BN.

Terdahulu konvensyen juga meluluskan sebulat suara "Agenda Masa Depan Negeri Kelantan" yang memperincikan komitmen Umno dan BN negeri ini terhadap usaha memajukan negeri dan rakyat selaras dengan Deklarasi Semerak.

Agenda itu yang meliputi 10 cabaran antaranya menyentuh mengenai perlunya reformasi politik BN negeri serta perubahan sikap di kalangan anggotanya. -- BERNAMA

BD AHH